

En om cun angaschamaint e success

Intervista: Franco Quinter e las sias activitads

CUN FRANCO QUINTER Ò DISCURRIA
PEDER ANTONA BALTERMIA

■ **Franco Quinter (52) è carschia se e stat anc oz a Vasarouls. Siva da divers mandats politics ainten la sia regiun pi strètga è el sa deditgia cumpletamaint all'economia. Chegl eneda cun l'interpresa da misiraziun HMQ AG cun sedia a Tusang. Ed alloura cun la participaziun tar divers projects. En om cun angaschamaint, er an taimps betg schi simpels.** La derivanza professunala da *Franco Quinter* è igl inschignier e geometer. Ansemen cun dus partenaris ò el fundo igl 1997 en'interpresa da misiraziun, engineering, planisaziun e consegliazion segl camp digl svilup da projects. L'interpresa è gio dadei betg ple activa angal aint igl Grischun. Ins ò fitgia pe er a Turitg ed agl cantun Argovia ed ò oz passa 50 ampluias. Quinter è scu magnafatschenta responsabel da chesta firma tgi ò oz ena structura dad ena gruppa cun set societads. Siva digl 2015 dattigl er igl segn dall'interpresa HMQ an Asia, numadamaint a Bali an Indonesia. L'ò ins realisescha cun 30 ampluias models an 3D da biets tgi vignan elaboros alloura an Svizra u er ainten otras teras.

Parallel cun las sias activitads professunalas è Quinter sa deditgia igls amprens onns er alla politica. El è sto durant 11 onns mastral da Brinzauls e 12 onns deuto agl consegl grond per igl circuit Belfort. Anfnignen igl 2016 è el er sto commember digl consegl dalla Banca cantunala. Igls davos onns en la sias activitads sa concentradas sen l'economia. Dasperas las lavours da tgesa tar HMQ è el commember e presidijscha er diversas atgnas societads acziunarias ed è er coninziant da projects pi gronds. Uscheia è el president digl consegl d'administraziun dallas pendicularas Tambo a Spleia u scu preschento da curt en center d'innovaziun a Coira tgi costa 30 milliuns francs e duess dar lavour a 300 persungas. En project tgi el realisescha cun igl sies cusregn *Valentin Bearth* scu architect.

Franco Quinter, las Vossas activitads professunalas en pitost orvart la Regiun Alvra, ma Vous vez adegna abito ed abitez anc ossa a Vasarouls. I plai da mais anc adegna cò tar nous?

Franco Quinter: Vasarouls è mia patria. Cò sunga carschia se e cò vaia las mias rieichs. A Vasarouls ma sainta fitg bagn ed ia sa adegna puspe carger se mias battareias. Ia ma saint privilegia da dastgeir veiver ainten uscheia ena bela regiun.

Voss bab, Fridolin Quinter (89), è sto scolast, ma politicamaintg ischas Vous ena veia sumigianta scu el. El è sto pi dei mastral da Brinzauls, numdamaintg 16 onns. È chella veia ainten igls fastezs digl bab stada ensacu programmada?

Programmada è chella betg stada. Er betg planisada. Gl'è simplamaintg sa do uscheia. Ainten en pitschen cumegn scu



Franco Quinter ò investo blera energeia aint igl sies angaschamaint professunal. El ò pero er adegna gia en igl per la tgossa publica.

chel da Brinzauls è chegl an sasez betg ensatge extraordinari. Mies bab è sto per me en bung exaimpel per la politica e la lavour publica. E scu inschignier e planisader am òn las lavours publicas adegna interesseo.

Siva vez alloura concentro las Vossas forzas sen la Vossa interpresa ed igl success è er nia. Noua vasez igls muteivs principals da chest success?

Per me ègl adegna sto cler tgi igl mies futur seia betg la politica, mabagn l'economia. Ia va pero adegna via las lavours politicas scu fasa impurtanta an mies svilup personal. An tot chels onns vaia m'accurschia tg'ia ma muaint pi gugent autonom e tg'ia ma saint pi bagn ainten l'economia. Ia sung pero dall'ideia tgi fiss bung schi mintgign surpigless eneda en pensum ainten la pubblicitad. Alloura ins vei quant impurtant, pero er quant grev tgi gl'è da surpiglier chellas funcziuns.

La professiun da geometer è sa midada ferm igls davos decennis. È davantada adegna pi tecnica. Tgenegnas en stadass las grondas sfidas?

Igl antier svilup digls davos onns è impressiunont e plagn tensiun. Cun la digitalisaziun ed igl svilup dalla nova tecnologia en las lavours digls geometers sa midadas fitg. Oz è igl geometer betg «angal» administratour digls singuls taragns, mabagn er manager da project e geoinformaticher.

A Turitg ed agl cantun Argovia vez er ena filiala. Vogl oz prest betg ple sainza las aglomeraziuns?

Fatg è tgi la fiera aint igl Grischun è limitada perveia da differents muteivs e tgi las

pusebladads da sviluppar ensatge en duvradas se ensacuras.

Nous persequitagn la filosofia da saveir purtar cun las nossas filialas lavour aint cantun e da pudeir realisar uscheia interessants projects. Uscheia savainsa er porscher plazzas d'amprendissadis idealas a nous amprenidists.

Ègl er en tant perche gl'è tgi ins survign l'ò pi tgunsch forzas da lavour qualifitgeidas?

Chegl è perfranc er uscheia. Fatg è pero tgi ainten chellas regiuns pulsescha l'economia bler pi fitg e chegl è per nous adegna puspe ena sfida d'ans sviluppar anavant. Chegl fò bagn a mintga interpresa.

Misiraziun 3D ed animaziun da video en oz expressiuns currentas tar la Vossa bransch. Savez declarar chegl curtamaintg a nous laics?

Pi bod ins pigliva se e dava anavant las datas an 2D. La preschentaziun spaziala era antras chegl fitg restranscheida. Cun far las misiraziuns an 3D savainsa surdar ossa las datas an treis dimensiuns, uscheia tgi chellas son neir duvradas effiziant per divers projects. Uscheia savainsa mussar pi bagn scu tgi igl project vign a vaseir or cura tg'el è realiso.

Er aint igl Grischun vez gia projects interessants. Egn è tar igl nov tunnel dalla Retica digl Alvra. L'ò faschez igl accumpnamaint digl ambiaint. Tge è chegl exactamaintg?

En accumpnamaint digl ambiaint è necessari schi egn u ples spazis digl ambiaint en partutgias e consequenzas negativas u prievls pigl ambiaint son neir redutgias.

Tigl project digl tunnel digl Alvra vagn nous surtot la responsabladad tar igls divers andamaints dalla lavour scu er tar igls sedimaints digl material.

A Bali vez ena dependenza cun ca. 30 collaboratours. Chella vign tgrada digl Voss partenari Matthias Müggler. Pertge gist an Indonesia e tge ins so far l'ò migler?

Ainten la veta dattigl magari tgossas betg planisadas. Uscheia vagn mies partenaris ed ia fundo a Bali avant varsaquants onns ena fundaziun per orfens. Cun la StarKids Foundation savagn nous porscher en avigneir a duple tgi 100 novnaschias. Chella fundaziun è davantada ena part dalla nostra veta. Nous vagn savia realisar divers svilups a Bali cun porscher plazzas da lavour economicas. Cun igls noss architects ed inschigniers indigens savainsa realisar interessants projects. A Bali savainsa biagier se e sierar plazzas da lavour ed ainten Svizra ischans cotras pi concurrenzials. Chel svilup impressiunont ans massa tgi nous nign er agl avigneir ad investar an chella direczion.

La societad da pendicularas Tambo a Spleia stava betg sen bunas tgommas. Vous vez surpiglia chella scu president digl consegl d'administraziun. Ossa parigl da marschar. Er ainten la Regiun Alvra vessigl do societads tgi vessan duvro sustign?

Cura tg'ia va surpiglia avant en pèr meis chesta funcziun, alloura savevans betg anc schi nissan dad evitar igl concurs. Siva dad aveir luvro se igl antier passo ischans nias da spindrar chella fatschenta tgi è fitg impurtanta per la vallada. Per antant. Ossa ègl da metter tot sen en fundamaint pi stabil.

Ea, gl'è uscheia, er an nossa regiun davigl e dattigl projects ed interpresas tgi dovrans sustign. Nossa regiun è cò pero betg la suletta. Chegl è en problem general dallas regiuns periferas.

En project tgi vagn er preschento da curt è chel center d'innovaziun a Coira. Scu architect vez savia gudagner Voss cusregn, Valentin Bearth. Per l'amprema geda ena tala collaboraziun?

Ea, chegl è l'amprema geda. Igl project e la lavour comunabla cun igl mies cusregn en per me ensatge singular.

Vous stez an Surmeir, dessigl betg projects tgi gidessan anavant chella regiun tgi ò tuttegna da batter cun difficultads economicas?

Ia crei fitg ve digl potenzial dalla nostra regiun. Chel è da nom. Deplorablamaintg so el betg neir nizzigia an sies rom basignevel. Chegl am fò malaveta.

Las sfidas da nossa regiun vignan betg pi simplas. Perche gl'è stuiainsa neir activs. Nossa regiun ò adegna puspe musso tg'ella è bunga da metter an peis ensatge. Uscheia per ex. igl center da biatlon a Lantsch tgi è naschia avant passa 10 onns dad ena ideia dad en pèr inizians, pero er l'interpresa dad *Enrico Uffer* a Savognin. El ò realiso sia visium.

Ia vess plascheir da realisar novas ideas ansemen cun otras personalitads da nossa regiun.

En impressari scu Vous ò er adegna visiums pigl avigneir. Lessas tradeir ensatge?

Ideias e visiums am mantgan betg. Perche gl'è catta la mia fasa da veta actuala er uscheia interessanta. Concret dastga agl rom da noss InnoQube Swiss manar ansemen cun mies partenaris en project tgi pudess esser d'interess er per nossa regiun. I vo per la colliaziun digls temas digitalisaziun, sport e turissem.

Anc ena davosa dumonda, Vous faschez part eneda ad ena band quasi da famiglia. La pains tgi chella n'exista betg ple, ma noua vez oz las Vossas preferentschas culturalas?

La musica è anc adegna egn da mies gronds hobis. Er schi nossa band exista ord muteivs da taimp betg ple faschainta tuttegna da taimp an taimp musica ansemen. Tiers chegl malegia fitg gugent. Maletgs abstracts e sculturas am fascineschan. Fitg impurtantas en per me pero las pizzas. Ia vign gugent ad ot e vign ouras or tras nossa bellezza cuntrada. Cunchegl tgi mia lavour è mia passium e betg en stueir svilupescha igl mument la mia nova ideia d'affar cugl focus «spustar pizzas» or da chella passium.

reclama

Gemeinsam
mit und für
Menschen
mit geistiger
Behinderung

www.insieme.ch/spenden

KAUFE IHRE
AUTOS
Alle Marken
Auch für Export und
Unfallfahrzeuge
Km und Zustand egal
081 252 28 29
079 772 54 07
www.auto-aria.ch

Falls Sie sich
fragen, ob
Spenden
Sinn macht,
fragen Sie ihn.

www.fragen-sie-ihn.ch

Im Kleinen Grosses bewirken.
PC 80-1115-1 www.heks.ch

Wir helfen Menschen, möglichst
lange selbstbestimmt zu leben.

Helfen Sie uns dabei. | prosenectute.ch | PC 87-500301-3

PRO
SENECTUTE
GEMEINSAM STÄRKER



HEKS
EPER

erotik.suedostschweiz.ch

Tanja, lustvoll, privat+ direkt. 0906 00 00 46
(Fr. 2.50/Min.)

Gönne dir etwas Gutes! Alleingelassene, süsse
Frau sucht heute noch Sex.
078 840 18 87, www.originalsex.ch

MS

Schweizerische
Multiple Sklerose
Gesellschaft

www.multiplesklerose.ch